

## **Kile Mungu Anachokipenda Zaidi ni Tabia Njema**

Na uzuri wa Bwana, Mungu wetu, uwe juu yetu—**Zaburi 90:17.**

Mungu anapenda uzuri, lakini kile anachokipenda zaidi ni tabia njema sana.... Ni uzuri wa tabia ambao hautaangamia, bali unadumu katika zama zisizokoma za umilele.

Bwana Msanifu mkuu ameumba yungiyungi, akiyafanya mazuri mno kiasi kwamba yanashinda utukufu wa Sulemani. Ni kwa jinsi gani basi atamjali mwanadamu, ambaye ni mfano na utukufu wa Mungu. Anatamani kuwaona watoto Wake wakionesha tabia inayofanana na Yake. Kama miale ya jua itiavyo maua rangi tofauti na za kupendeza, ndivyo na Mungu anavyoweka nafsini uzuri wa tabia Yake mwenyewe.

Wale wote wanaouchagua ufalme wa Yesu wa upendo na haki na amani, wakiyafanya matakwa Yake kuwa ya muhimu zaidi ya yote, wanaunganishwa na ulimwengu wa juu na kila baraka ihitajikayo kwa ajili ya maisha haya inakuwa yao. Katika kitabu cha majaliwa ya Mungu, kitabu cha uzima, tumepewa ukurasa kila mmoja wetu. Ukurasa huo una kila kitu kuhusiana na historia yetu; hata nywele za kichwa zinahesabiwa. Kamwe watoto wa Mungu hawatoki Akilini Mwake.

Maonesho ya kidunia, hata yawe ya kuvutia jinsi gani, hayana thamani machoni pa Mungu. Zaidi ya yale yaonekanayo na ya kitambo Yeye huthamini yasiyoonekana na ya milele. Ya kitambo yana umuhimu tu pale yanapodhihirisha yale ya milele. Kazi bora zaidi za sanaa hazina uzuri unaoweza kulinganishwa na uzuri wa tabia, ambayo ni matunda ya utendaji kazi wa Roho Mtakatifu ndani ya nafsi...

Kristo alikuja ulimwenguni na kusimama mbele ya wana wa wanadamu akiwa na hazina ya upendo wa milele na hii ni hazina ambayo, kwa njia ya uhusiano wetu na Yeye, tunapaswa kuipokea, kuidhihirisha na kuwapatia wengine....

Tunapaswa kutofautishwa na ulimwengu kwa sababu Mungu ameweka muhuri Wake juu yetu, kwa sababu Anadhihirisha ndani yetu tabia Yake mwenyewe ya upendo.